

Prome Minister a ricibi Delegacion Paralimpico Aruba

A entrega bandera di Aruba na atleta Elliott Loonstra

Nos atleta paralimpico cu lo representa Aruba na Weganan Paralimpico na Paris

Dialuna ultimo, Prome Minister Evelyn Wever-Croes a ricibi e Delegacion Paralimpico Aruba y e atleta reconoci y stima pa henter e pueblo di Aruba, Elliot Loonstra, cu ta bay representa Aruba pa di dos biaha na e Weganan Paralimpico. E aña aki e Weganan Paralimpico ta na Paris y lo inicia na final di augustus.

Den number di Gobierno di Aruba, Prome Minister a entrega Elliott e bandera di Aruba cu el lo bay desfila cune na Paris, y ta desea Elliott tur clase di exito pa cu e competencianan.

Prome Minister a ricibi di e Delegacion Paralimpico e uniform oficial cu Elliott y e delegacion lo usa na Paris du-



rante e Weganan Paralimpico. Tambe Prome a ricibi e uniform pa Minister di Deporte Endy Croes.

Prome Minister a expresa di a mira Elliott desaroya den e ultimo añanan den un atleta cu hopi dedicacion y pasion pa loke e ta haci. Elliott ya

caba tin un total di 15 medaya den e arecanan di deporte cu e ta practica, den diferente competencia regional y internacional cu el a participa.

“Nos ta sumamente orguyoso di Elliott, pa tur su dedicacion y entusiasmo pa representa Aruba orguyosamente.



El a expresa cu e ta bon prepara y cu e tin un bon plan, y nos tin tur confiansa cu e ta bay ta exitoso.”

“Tambe mi kier a gradici e comision cu ta busca varios atleta y prepara nan di e miho manera pa representa nos pais dignamente. Nos ta spera cu e entusiasmo y logronan di

Elliott por inspira hopi mas atleta pa asina Aruba por conta cu un delegacion mas grandi den futuro. Elliott hopi exito y danki pa tur locual bo ta haci pa e dushi baranca aki. Nos ta sumamente orguyoso di bo”, Prome Minister a expresa.

Ta sigui eleva e nivel di e hoben profesionalnan cu ta traha cu Comite Olimpico Arubano

Jonathan Wever lo haci e Masters Degree di MEMOS den 2024-2025

Dialuna atardi den sala di reunion na oficina di COA, hunto cu Presidente Wanda Broeksema y Secretaria General Nicole Hoevertsz, a firma e acuerdo final pa asina hoben tecnico di COA, esta Jonathan Wever, por cuminsa e proceso pa participa na e Masters Degree MEMOS, cu ta e “Executive Masters in Sport Organisation Management”, cu ta patrocina pa “Olympic Solidarity”.

Cu e oportunidad aki, ta



brinda e tecnico deportivo cu tin 2 aña ta traha di cerca cu e federacionnan deportivo cu ta forma parti di COA un

oportunidad pa amplia su conocimiento pa asina por asisti COA y e federacion riba un nivel administrativo y

di maneho.

Tur esaki cu e meta pa mehora e calidad di servicio cu lo brinda nos deporte na Aruba. Den aña 2022 Jonathan a logra termina e curso di “Ciencias Aplicadas al Deporte” na e Centro de Alto Rendimiento (CAR) na Sant-Cugat, Barcelona. Ademas Jonathan a participa na e simposio pa Comitenan Olimpico na Olympia, Grecia, asina cuminsando e trayecto pa amplia e conocimiento den e mundo Olimpico den varios aspecto. Awor e trayectoria aki ta wordo amplia cu

e tesis cu Jonathan lo traha y presenta, cu tin como topico; “Identificar debilidades estructurales dentro de las federaciones deportivas locales y crear planes efectivos de mejora”.

Jonathan a scoge pa haci esaki den e idioma Spaño, como den nos region esaki ta e idioma predominante. Por medio di e topico aki, Jonathan ta spera di dialoga cu nos federacionnan local y asina tambe ofrece un ayudo adicional na e topico, y asina haci bon uso di loke lo studia pa yuda nos deportenan.

Pronto por presencia e caredanan di Drag Race riba un pista acredita na standard internacional

Internacional Raceway Park Palomarga pronto lo keda inaugura

Recientemente, Minister Endy Croes a reuni cu e miembronan di directiva di Arubaanse Bond van Motorsports (ABM), kendenan ta atende cu Palomarga.

Durante e encuentro, a trata diferente punto cu ta pendiente pa asina finalisa cu e proyecto di renobacion di e pista di Palomarga den su totalidad. Tambe directiva di ABM a presenta diferente fecha cu wordo aproba pa



careda di drag race por tuma luga. Minister Endy Croes a indica cu e ekiponan cu falta

pa finalisa cu e trabou, esta “compound” e pista ta na caminda pa Aruba. Ta premira

cu e ekiponan lo ta Aruba fin di luna di augustus y asina por cuminsa programa careda

na Palomarga. “Nos ta contento di por a reuni cu e tres miembronan di ABM, kende a duna informacion di e ultimo desaroyo na Palomarga. Nos a duna nos aporte, sosten y guia pa e proyecto aki por wordo finalisa den su totalidad.

Pueblo di Aruba por disfruta di careda di drag race riba un pista acredita na standard internacional, alabes e miho pista di Caribe”, Minister Endy Croes a conclui.